

Ludi–Schwandel–Recycling Song: «Bring back»

Alle: (Melodie: «My Bonnie») E-Dur

Das isch euse Song vom Recycle
De neuscht Ludi und Schwa-a-ndel Hit
Am Recycle gits nüt zum mäkle
Dänn da mached mir ali mit:

Bring back, bring back, oh bring back din Güsel an rächte Ort.
Bring back, bring back, recycle isch s'magischi Wort.

Du drinksch vor de Schuel no en Ice Tea
Du chöisch i de Pause än Snäck
Du schläcksch nach em z'Mittag es Glacé
Und schmeissisch dänn alles ewägg.

Alle: Oh nei! (rufen) (Melodie: Refrain von «My Bonnie»)

Bring back, bring back, oh bring back din Güsel an rächte Ort.
Bring back, bring back, recycle isch s'magischi Wort.

Rap KiGa mit Rhythmusinstrumenten: (2-3 mal)

Znüni Böxli – Wasser Fläschli: *rasseln* – *schütteln*
Suppelöffel – Chindsgi Täschi: *schlagen* – *schwingen*

Alle: Bring back, bring back, oh bring back din Güsel an rächte Ort.
Bring back, bring back, recycle isch s'magischi Wort.

Rap UST:

Tap, clap, tap, clap
Das isch de Recycling–Rap:
Coci-Büchs und Jogurtbächer
Mini Pic und Rüeblifächer
Öpfelbütschgi und Banane
Wo chunt au de Komposcht ane?
Babybel schön rot und wachsig
Chinder-Ei mit Überraschig
Schoggi Folie, Eierschale
La-n-ich nöd an Bode falle.
Pop Corn Packig, Capri Sune
Haribo für gueti Lune
Muffin mit Papiermanschette
All's mues zrugg i d'Rohstoff-Chette!
Alles hät sin bstimmte Platz
Hokus Pokus und Ratz Fatz.

Rap KiGa mit Rhythmusinstrumenten: (2-3 mal)

Znüni Böxli – Wasser Fläschli: *rasseln* – *schütteln*
Suppelöffel – Chindsgi Täschi: *schlagen* – *schwingen*

Alle: Bring back, bring back, oh bring back din Güsel an rächte Ort.
Bring back, bring back, recycle isch s'magischi Wort.

Rap MST:

Tap, clap, tap, clap
Das isch de Recycling-Rap:
Em Trotti fehlt scho lang es Rad
Um s'Cap vom Batman isch's nöd schad.
De Game Boy isch scho lang nüm cool.
Und au de I-Pod nüm mis Tool.
Die Cindy-Büecher, Harry Potter
Sind zwar flott und mängisch flotter
Ggläse hani's sächzäh Mal:
Für d'Spilzübörs' sind's ideal.
Das Tschutti Libli vom Ronaldo
Gaht ab sofort und per saldo
A min chline Cousin z' Bern.
Au de hät de Ronaldo gern.
Villi Sache cha mer rette
All's mues zrugg i d'Rohstoff-Chette!

Rap KiGa mit Rhythmusinstrumenten: (2-3 mal)

Znüni Böxli – Wasser Fläschli: *rasseln – schütteln*
Suppelöffel – Chindsgi Täschli: *schlagen – schwingen*

Alle: Bring back, bring back, oh bring back din Güsel an rächte Ort.
Bring back, bring back, recycle isch s'magischi Wort.

Ich güd nöd mit Wasser am Hahne
Verschwänd kei Papier und kei Stift
Bim Liecht bruche lueg ich gnau ane
Und nimm d'Stägetritt statt de Lift.

Heb Sorg, heb Sorg zu Sache und Mänsche und Chrut und Tier
Heb Sorg, heb Sorg zur Mitwält zu dier und zu mier.